

Cun bler angaschamaint ed anc daple cor

Gion Nutegn Stgier/FMR

L'emda passada ò la cumpagneia regionala Alvra dalla protecziun civila già igl curs da repetiziun 2022. Tar chel on igls omens er fatg sarvetsch a favour digls cumegnns e dalla publicitad. Seis omens èn stoss scu assistents ainten la tgesa d'attempos a Savognin.

Igl schurmetg civil è egna dallas tschintg organisaziuns partenarias dalla protecziun civila dalla populaziun. Chegl èn: pulizeia, pumpiers, fatgs da sanadad, menaschis tecnics e schurmetg civil. Agl schurmetg civil digl Girschun appartignan ca. 2500 omens e vers 60 donnas. Sarvetsch fon els ed ellas an 12 cumpagneias regionalas digl schurmetg civil, tar ena cumpagneia cantunala u er tar furnaziuns spezialas dalla protecziun civila. Egna da chellas cumpagneias regionalas è la cumpagneia Alvra. L'emda passada ò già li igl curs da repetiziun da premaveira da chella cumpagneia regionala. Alla testa da chella stat Gion Carla Dosch da Cunter. Ena gruppa da seis omens, da total 18 omens, tgi appartignan alla secziun d'assistenza e tgira è er stada an acziun ainten la tgesa d'attempos dalla Center da Sanadad SA Savognin. En de è stada segl program en'excursiun cun las senioras e cugls seniors a Rona, noua tg'è nia sarvia café e turta aint igl «Bistro Monica» tar Monica e Giovanni Cerrato.

Aglmanc en'excursiun per onn

Hannes Gugerli magna ainten la tgesa d'attempos ena partiziun da tgira. El è alloura er igl capo-secziun dalla secziun d'assistenza dalla cumpagneia regionala Alvra. Savens ò igl tgirunz er da far cun Karin Luzio-Kopp tgi segna tar la tgesa d'attempos pigl program d'activitad. Uscheia è sa dada la collaboraziun cun la tgesa d'attempos e cugl schurmetg civil. Schinavant tg'è pussebel cumpeglia igl program annual d'activitad e da divertimaint aglmanc en'excursiun per onn.

30 cussadentas e cussadents on galdia la cumpagneia

Igl è duvro ena pulita organisaziun logistica per manar igls attempos cun bus da Savognin a Rona. An chella tgossa on la Center da Sanadad SA Savognin SA cun Karin Luzio-Kopp e la protecziun civila cun Hannes Gugerli già en fitg bung mang. Bel è er tgi schi senioras e seniors von sen viadi èn er adegna otras persungas prontas da porscher mang allas donnas ed agls omens tgi lavouran ain-




Plascheir tar la cussadenta, igls ustiers, l'assistenta ed igls dus omens digl schurmetg civil. (davant) Claudia Forrer-Torriani e davos (da san.) Monica e Giovanni Cerrato, Luzia Tanner-Wasescha, Flavio Cola ed Alexander Andrist.

ten la tgesa d'attempos. Tar egna da chellas totga per exaimpel Luzia Tanner-Wasescha. Sto d'organisar per eir a Rona èn er bus noua tg'è sto pussebel da transportar er las donnas ed igl omens tg'èn dependentas e dependents da soptgas da roda. Graztgia agls bungs con-

tacts da Hannes Gugerli ins è nia tar bus adattos per far chel transport da persungas. Karin Luzio-Kopp ò alloura organiso agl «Bistro Monica» la «marendà» cun café e turta. 30 cussadentas e cussadents on galdia la cumpagneia ed igl beleza de da premaveira.

Antop cun oters giasts

Tot resepect dalla directoura Christine Demarmels e da sia substituta Sandra Luzio, tg'èn er stadas a Rona per solidar igls avdants e las avdantas dalla tgesa d'attempos. Anc daple respect maretan igls seis omens digl schurmetg civil. Cun grond angaschamaint ed anc daple cor, cun passiu e cun pazienz-tga on els già chito da senioras e seniors e vurdo tgi mintgign sa catta bagn. Cun esser er oters indigens a Rona tar Monica e Giovanni Cerrato on er chels già en immens plascheir d'antupar igls cussadents e las cussadentas. Igl èn sa dos bels discurs tranter senioras e seniors ed igls oters giasts digl «Bistro Monica». Blers digls seniors e dallas senioras on rachinto cun gost digls taimps passos, uscheia tgi mintgign ò già plascheir. An mintga cass, satisfacziun dall'excursiun on già tots, cun la speranza tgi la proxima suonda prest.



Mintgign ò gido noua tg'è sto basigns.

Fotos Gion Nutegn Stgier